

Рамазонда тунги намоз 01

[Ўзбекча – Uzbek – الأوزبكي]

Муҳаммад Мухтор аш-Шинқитий

Таржимон: *Абду Абдуллоҳ Шоший*

Нашрга тайёрловчи: *Шамсиоддин Даргомий*

2014 - 1435

IslamHouse.com

﴿ قيام رمضان ١٠ ﴾

« باللغة الأوزبكية »

محمد المختار الشنقيطي

ترجمة: أبو عبد الله الشاشي

مراجعة: شمس الدين درغامي

2014 - 1435

IslamHouse.com

Бисмиллаҳир роҳманир роҳим

Тунги намознинг фазилати

Оламлар Раббиси Оллоҳга ҳамду сано бўлсин. Набийлар ва расулларнинг энг шарафлиси, саййидимиз ва Пайғамбаримиз Муҳаммадга, унинг аҳли-оиласи ва саҳобаларига салавоту саломлар бўлсин.

Ибодат ва қурбатларнинг энг улуғи ва энг афзали ҳамда Оллоҳ азза ва жалла яхши кўргани, қиёмул-лайл (яъни тунги намоз)дир. Оллоҳ таоло Мубин Китобида мақтаганидек, тунги намоз солиҳ кишиларнинг одоби ва Оллоҳнинг тақводор бандаларининг ишидир. Оллоҳ азза ва жалла ушбу ой, яъни Рамазон ойи рўзасини мўмин бандаларига фарз қилди, ҳидоят Пайғамбари соллаллоҳу алайҳи ва саллам унинг кечаларида намоз ўқишга чорладилар. Расулуллоҳ соллаллоҳу алайҳи ва салламнинг: "Ким Рамазонда иймон ва иҳтисоб (яъни савоб умиди) билан (кечалари намозда) қоим бўлса, унинг ўтган гуноҳлари мағфират қилинади"¹, деган

¹ Муттафақун алайҳи.

сўзларига иқтидо қилиб, итоат этган ҳолда бу муборак ойнинг тунги намозида зўр ғайрат қилиш мусулмон кишига жуда муносибдир.

Қиёмул-лайл фазилатлардан бир фазилат бўлиб, Оллоҳнинг бандаларига ато қилган неъматларининг энг улуғларидан ҳисобланади. Агар Оллоҳ бандаларидан бирини яхши кўрса, Ўзинг раҳмат эшикларини унга очади ва Ўзига тоат қилиш йўлини унга осон қиласди, шунда унинг қалби яхшилик учун очилади. Дарҳақиқат, Оллоҳ ушбу неъматини Пайғамбарига бериб, шундай дейди: "(Эй Муҳаммад), **Биз сизнинг қалбингизни** (иймон ва Куръон нури билан) **кенг-мунаввар қилиб қўймадикми?**"¹. Агар Оллоҳ бандасига яхшиликни рано кўрса, унинг қалбини мана шу ибодатга очиб, уни осон қилиб қўяди. Мўмин киши тунги намозида бардавом бўлавериб, уни ўз нафсидан ҳам яхши кўриб қолади. Ҳатто шу қиёмул-лайлдан, Оллоҳ жалла жалалухга муножотлар қилишдан, Унинг қаршисида унда кўзлар ва қовоқлар дам олиб, оромланадиган бир соат туришдан маҳрум бўлса,

¹ Шарҳ сураси: 1.

ўзида хафаликни, ранжишни ва аламни топади. Ваҳолангки, у Ҳай (тириқ) ва Қойюм зотга мурожаат қилмоқда.

Оллоҳ таоло охиратни яхши кўрган, кечалари намоз ўқишда ғайрат қилган кишиларни мақтади ва улар ҳақида шундай деди: **"Уларнинг ёнбошлари ўрин-жойларидан йироқ бўлур** (яъни тунларини ибодат билан ўтказишиб, оз ухлайдилар). Улар Раббиларига қўрқув ва умидворлик билан дуо-илтижо қилурлар ва Биз уларга ризқ қилиб берган нарсалардан инфоқ-эҳсон қилурлар"¹.

Яна Оллоҳ субҳонаҳу ва таоло уларнинг фазилатига гувоҳ бўлиб, хавф ва ражо аҳлидан эканликларини зикр қилиб деди: **"Ёки кечалари сажда қилган ва қиёмат-тик турган ҳолда тоат-ибодат қилгувчи, охиратдан қўрқадиган ва Парвардигорининг раҳмат-марҳаматидан умид қиласидиган киши** (билин куфру исёнга ғарқ бўлган кимса баробар бўлурми)?!"². Ким охират азобидан қўрқиб, Раббисининг раҳ-

¹ Сажда сураси: 16.

² Зумар сураси: 9.

матидан умидвор бўлса, кечани Оллоҳ жалла жалалуҳнинг зикри билан иҳё қиласи. Бу манзилатнинг фазилатини ва Оллоҳ субҳонаху ва таолонинг ҳузурида бу ибодатнинг даражаси олийлигини билгани учун тунни зикр билан ўтказади. Мана шунинг учун Набий соллаллоҳу алайҳи ва саллам амалларнинг фазилатлиларини айтиётуб: "Мўмин киши кечанинг ярмида ўқиган икки ракаат намози", дедилар. Яъни ибодатларнинг Оллоҳга энг севимли бўлганиларидан бири, мўмин кишининг кечанинг ярмида, унда дуолар эшитилувчироқ ва Оллоҳ жалла жалалуҳ томонидан ижобат қилиниши умид қилинувчироқ бўлган бир соатда ўқиган икки ракаат намозидир.

Рамазонда қиёмул-лайл

Рамазон ойининг тунги намозида суннат амал, саҳих ривоятларга таянган ҳолда, киши Расулуллоҳ соллаллоҳу алайҳи ва саллам йўлларидан юришидир. У зот алайҳиссалоту васалом Рамазонда ҳам, Рамазондан бошқа ойларда ҳам кечалари кўп намоз ўқувчи эдилар. Йилнинг қолган вақтларидаги суннатлари ҳам

шундай эди, лекин Рамазон кириб, охириги ўн кунлиги келса, ибодат учун белбоғларини маҳкам боғлар, кечасини бедор ўтказиб, оиласларини уйғотар эдилар. Буларнинг барчаси умматга бу ойнинг, айниқса охириги ўн кунинг фазилатини билдириш учун бўлган. Охириги ўн кунда бир кеча борки, у минг ойдан афзал, банда уни Оллоҳ жалла жалалуҳ учун қоим қиласидиган бўлса, бунга эришади. Бу шундай кечаки, уламолар у ҳақида шундай дейдилар: Оллоҳ бу кечани бутун йил ичидан танлаб олди. Бу кеча нафақат йилнинг, ҳатто асрнинг ҳаммасидан афзалдир. У қадр кечасидир. Оллоҳ субҳонаҳу ва таоло Қадр сурасида хабар берганидек, бу кечани Қуръонни тушириш учун ихтиёр этди, бу эса ушбу кечанинг шарафи ва фазилатига далолат қиласиди.

Расулуллоҳ соллаллоҳу алайҳи ва салламнинг қиёмул-лайлдаги йўллари, йўлнинг энг комили, энг гўзали, энг чиройлиси ва энг афзалидир. Ул зот соллаллоҳу алайҳи ва саллам кечаси намозга туриб, ортиқча чўзиб юбормасдилар. Шунингдек, тарки дунё қилиш ва ибодатда ғулув (чукур) кетишда йўлида ҳам

эмасдилар. Ул зот алайҳиссалоту вассаломнинг суннатлари ғулув кетиш ва қаттиқ қилишдан узоқдир. Шу сабаб, у киши алайҳиссалоту вассалом кечаси ухлар ҳам, намоз ўқир ҳам эдилар. Набий алайҳиссалоту вассалом дедилар: "Аммо мен рўза ҳам тутаман ва тутмайман ҳам, кечаси намоз ҳам ўқийман ва ухтайман ҳам, ҳамда мен аёлларга ҳам уйланаман, энди ким менинг суннатимдан юз ўгирса, мендан эмас. Ким суннатимдан юз ўгирса, мендан эмас"¹.

Абдуллоҳ ибн Амр ибн Ос разияллоҳу анхумо тунги намозни узмасдан тонггача давом эттиришни сўраганида, уни бундан қайтардилар. Шунингдек, Пайғамбар алайҳиссалоту вассаломнинг кечанинг учала қисмида ҳам намоз ўқиганлари ривоят қилинади. У киши кечанинг аввалида, ўртасида ва охирида намоз ўқидилар, витрлари ва намозлари кечанинг охириги қисмида тугади. Шунга асосланиб уламолар: Бутун кечани намоз ўқиш билан ўтказмаслик суннат, дейишган. Фақат айrim уламолар Рамазоннинг охириги ўн кечасини

¹ Муттафақун алайҳи.

истисно қилиб: Бу кечаларда намоз билан қоим бўлишга ҳаракат қилишлик афзал, бутун кечани намоз билан ўтказса ҳам зарари йўқ, дейишган. Чунки Оиша разияллоҳу анҳо айтадиларки: "(Набий алайҳиссалом охириги ўн қунликда) кечани тирилтирадилар (яъни бедор ўтказардилар)"¹. Бу у зот соллаллоҳу алайҳи ва салламнинг кечаси билан ухламаганликларига далолат қиласди.

Пайғамбар алайҳиссалоту вассаломнинг йўллари, кечанинг охирида намоз билан қоим бўлишлик эди. Шунга кўра уламолар айтадиларки: Киши кечанинг аввалида ухлаши ва охирида қоим бўлиши бир қатор ишларга биноан афзалдир:

Биринчи: Бу вақт, кеча вақтларининг энг афзали ва энг шарафлисиdir. Зеро Оллоҳ таоло уни нузули учун ихтиёр этгандир. Набий соллаллоҳу алайҳи ва саллам хабар бергандаридек, Оллоҳ таоло дунё осмонига Ўзининг улуғлиги, буюклиги ва камолига лойиқ тарзда тушади. Оллоҳ Ўз зотига, улуғлиги ва камолига

¹ Бухорий ривояти.

муносиб тарзда ҳеч қандай таъвилсиз, таътилсиз, ташбиҳ ва тамсилсиз ҳақиқий суратда тушади, "ва тавба қилувчи бормики, тавбасини қабул қилсан; дуо қилувчи бормики, ижобат қилсан; истиғфор айтувчи бормики, мағфират қилсан, деб нидо қиласди"¹. Мана бу, кечанинг охириги қисмининг фазилатига ишора қиласди.

Баъзи олимлар айтишади: Агар киши уйғонишига кўзи етса, кечанинг охириги учдан бир қисмида намозга тургани афзалдир. Лекин ухлаб қолиш эҳтимоли катта бўлиб, кечанинг охириги учдан бирида туролмаслигига кўзи етса, ярим кечага довур кечиктиргани афзалдир. Чунки ярим кеча кечанинг охириги учдан бирига яқинроқдир. Намозда қоим бўлишнинг фазилатли вақтига қанча яқин бўлса, ажри ҳам шунга яраша улкан бўлади.

Тунги намозни кечанинг ўрта учдан биригача олиб боради, чунки қутиб чарчайди ва мashaққат чекиб, қийналади. Набий алайҳиссалоту вассалом: "Савобинг чеккан заҳматингга

¹ Бухорий ва Муслим ривояти.

*яраша бўлади*¹, деганлар. Бундан қўринадики, қийинчилик ва мاشаққат ибодат ва қурбатнинг ажрини зиёда қиласар экан. Шунга қўра, кечанинг аввалида намозга турмасдан, кечанинг ярмигача кечиктириб, ўшанда намозда қоим бўлгани афзал, дейишади.

Баъзи олимлар айтишади: Агар тунги намозни яrim кечагача кечиктириши бомдод намозининг зое бўлишига (яъни намозга ухлаб қолишига ёки жамоатдан қолишига) олиб келса ёки bemажол тинкаси қуриб, Қуръонни тушуммаган ва фаҳмламаган ҳолда намоз ўқиса, унда тунги намозни хуфтоннинг кетидан ўқигани афзалдир. Чунки у фаҳмлашга, Қуръонни тадаббур қилишга қодирроқ ва хушуъсида комилроқ бўлади. Холбуки, у Раббисига мунојот қилаяпти.

Кечанинг аввалида ухлаш Пайғамбар алайҳиссалоту вассаломнинг одатларидан эди. Саҳиҳайнда Ибн Аббос разияллоҳу анхумонинг ҳадисидан, у Набий соллаллоҳу алайҳи ва саллам билан бирга холаси Маймунаникида тунади. Бу Набий соллаллоҳу алайҳи ва саллам саҳоба-

¹ Бухорий ривояти.

ларининг фазилати ва яхшиликка бўлган муҳаббатларини кўрсатади. Бу ёши кичик, лекин илми, фазли, улуғлиги ва Расулуллоҳ соллаллоҳу алайҳи ва салламнинг йўлларини яхши кўришида ёши улуғ бўлган бола, у зотнинг йўлларини тадқиқ қилди. Ҳатто кечаси туриб намоз ўқиганларидаги суннатлари ва йўллари қандайлигини кўриш ва қузатиш учун у зот алайҳиссалоту вассалом билан бирга ухлади.

Саҳиҳайнда келганидек, ёстиқнинг қўндаланг томонига ётиб ухлади. У айтади: “У зот алайҳиссалоту вассалом ухлаб, ҳатто пишилладилар”.

Иbn Аббос разияллоҳу анҳумо уммат учун бу йўлни ва бу суннатни ёдлаб олиш учун Расулуллоҳ соллаллоҳу алайҳи ва салламни диққат билан кузатарди. Расулуллоҳ соллаллоҳу алайҳи ва салламнинг йўлларидан баъзиларини ёдлаб, сақлаб қўйгани эвазига Буюк Оллоҳдан унинг ажру савобини улуғ қилишини сўраймиз.

У айтади: “Сўнгра турдилар (яъни Расулуллоҳ соллаллоҳу алайҳи ва саллам турдилар, бу

ярим кечадан кейин эди). Уйғонгандаридан биринчи қилган ишлари, күзларидан уйқуни (кетказиш учун) ишқадилар, кейин Оли Имрон сурасининг охиридан оятларни тиловат қилдилар: "**Осмонлар ва Ернинг яралишида ҳамда кеча ва кундузниң алмашиниб туришида ақл эгалари учун** (бир яратувчи ва бошқариб тургувчи зот мавжуд әканлигига) **оят-аломатлар борлиги шубҳасиздир**"¹. Бу оятларни якунлаб, Пайғамбар алайхиссалоту вассалом дедилар: "*Бу оятларни ўқиб, улардан сабоқ олмаган кимсага вайл бўлсин, буларни ўқиб, панд-насиҳат олмаган кимсанинг ҳолига вой бўлсин!*"².

Чунки булар улуғ оятлар бўлиб, Оллоҳ жалла жалалуҳнинг буюклигига далолат қиласди. Улар билан таъсирланиб, қўрқмаган қалбга ҳалокат бўлгай. Оллоҳ Ўз раҳмати билан ўнглаб қўймаган қалбга вой бўлгай.

Баъзи олимлар айтишарди: Ким ўзининг хушуъси ва таъсирчанлик даражасини билишни истаса, шу оятларни ўқисинда, ундаги нарсалар-

¹ Оли Имрон сураси: 190.

² Бухорий ва Муслим ривояти.

дан сабоқ олдими, улардан таъсирландими ёки йўқми, бир қарасин. Шунда Оллоҳ жалла жала-луҳнинг каломидан таъсирланиши ва хушуъдаги ўрнини билиб олади. Чунки Набий соллаллоҳу алайҳи ва саллам шу оятларни танладилар ва улардан таъсирланмаганга ваъид тайин қилдилар. Бу эса уларнинг улуғ оятлар эканлигига далолат қиласи.

Иbn Аббос ҳадисни давом эттиради: "Уларни ўқиб бўлганларидан кейин туриб, мешдан куйиб, таҳорат олдилар ва таҳоратни мукаммал қилдилар".

Коронғу кечада, айниқса қиши кечаларида таҳорат олишнинг лаззати бор, уни билган билади. Ва унда шундай ҳаловат борки, мўмин киши уни татиб қўрса, уни камдан-кам тарк қиласи. Яна унда гуноҳларнинг кечирилиши ва мартабанинг юксалиши бор: "Оллоҳ у сабабли гуноҳларни ўчирадиган ва даражаларни юксалитирадиган нарсага сизларни йўллаб қўяйми? Mashaққатли қийин ҳолларда ҳам таҳоратни

мукаммал қилиш", дедилар¹. Баъзи олимлар айтади: Бу қишининг қаттиқ совуқ кечаси, қоронғу кечанинг яримида таҳоратни мукаммал қилишдир. Ётоқ ўрнингдан, хотиржам, юмшоқ роҳатбахш жойингдан Оллоҳ жалла жалалухга муножот қилиш учун турасан ва аъзоларингга сув құясан. Шунда совуқнинг шиддати ва азиятини аъзоларингда топсанг, Оллоҳ субҳонаху ва таолога бандалик қилишнинг, ибодатнинг ва қурбатнинг лаззатини топасан. Ҳадисда Набий соллаллоҳу алайҳи ва саллам айтадилар: "Агар банда маҳбуби ва оиласи билан ухлаб, кечаси таҳажжуд учун турса, Оллоҳ таоло: Эй фаришталарим! Бандамни маҳбуби ва оиласидан турғизган нарса нима? — деб сўрайди. Улар: Илоҳимиз, Сенинг раҳматингни умид қилиб, азобингдан қўрққани сабаб, дейдилар. Шунда Оллоҳ таоло: Гувоҳ бўлингларки, Мен уни азобимдан сақлаб, раҳматимга эриштирдим, дейди".

¹ Муслим ривояти.

"У зот соллаллоху алайҳи ва саллам турдилар ва сув қуиб, таҳорат олдилар ва таҳоратни мукаммал қилдилар".

Иbn Аbbос: "Таҳоратни мукаммал қилдилар", деди. Унинг ўзига хос маъноси бор, чунки бу вақт, яъни кечаси таҳорат олиш, айтиб ўтгани-миздек, одатда бу вақтда сув совуқ бўлади. "Таҳоратни мукаммал қилдилар", дейиши Иbn Аbbоснинг фиқҳидандир. Яъни Пайғамбар алайҳиссалоту вассаломнинг таҳоратлари мукаммал бўлган, бу эса аъзоларни уч мартадан ювиш билан бўлади.

"Сўнгра турдилар, кейин мен ҳам у киши қилганидек қилдим", деди.

Қиёмуллайни енгил икки ракаат билан бошлиш

Пайғамбар алайҳиссалоту вассаломнинг суннатларидан яна бири, қиёмул-лайлни бошлишмоқчи бўлсалар, уни енгил икки ракаат намоз билан бошлилар, уларда қироатни узун қилмас эдилар. Уламолар айтади: Бу — йўлнинг энг мукаммалидир. Чунки мусулмон киши кечаси

намоз ўқигани туриб, намоз ўқиркан, нафси оромланиш, роҳатланиш ва дам олишга мойил бўлиб туради. Агар ибодатга киришиб, қиёмни (яъни қиёмда қироатни) узун қилса, унга малол келиб, эриниб қолиши мумкин. Шунинг учун Набий алайҳиссалоту вассалом енгил нарса билан бошлаганларки, то нафс ўргансин ва ундан кейин ҳар қанча узун ибодат қилишга қодир бўлсин.

Уламолар айтади: фарзларни янада кўпроқ хушуъ билан бажаришга ёрдам бериши, фарз намозларидан олдин ўқиладиган ротиба суннатларни жорий қилинишидаги фойдалар ва ҳикматлар жумласидан ҳисобланади. Агар фарздан олдин икки ракаат нафл ўқилса, кўпроқ хушуъ қилишга кўмак беради ва бу нарса тажриба қилинган. Агар одамларга синчилаб қарасангиз ва масжидларга эрта борувчиларни, намозга аzonдан олдин келувчиларни ёки аzon айтилмаси туриб масжидда бўладиганларни кузатсангиз, уларни одамлар ичида намозда кўпроқ хушуъ қилувчи ҳолида топасиз. Шунингдек, кечикиб келувчиларни ва бепарвонлик билан намозга такбир тушираётгандагина

келувчиларнинг хушуъси оз ва Қуръон билан таъсирланиши кам бўлган ҳолатда топасиз. Буни ўзингизда жуда аниқ кўришингиз мумкин, агар эрта боришга ва фарздан олдин нафл ибодат қилишга (яъни икки ракаат таҳийятул масжид намозини ёки суннатни ўқишига) ҳарис бўлсангиз, фарз намозига кўпроқ эътиборли бўласиз.

Шунинг учун уламолар айтишдики: Тунги намоз енгил икки ракаат билан бошланади. Чунки бу Қуръонни тадаббур қилишга ва аъзоларни ибодат ҳаракатларига юзланишига ёрдам беради. Ўша енгил икки ракаат билан қуч-қувват йифилади ва ҳозирлик қўрилади. Зеро Набий соллаллоху алайҳи ва саллам тунги намозни енгил икки ракаат билан бошлар эдилар.

Уламолар тунги намозда намозни очувчи дуони¹ узунроқ дуо бўлишини мустаҳаб санайдилар. Истифтоҳ дуолари уч қисмга бўлинади:

¹ Яъни истифтоҳ дуосини, одатда бу ўринда бизнинг диёрларда “Сано дуоси” ўқилади.

Биринчи қисм: Фақат дуодан иборат.

Иккинчи қисм: Фақат мақтовордан иборат.

Учинчи қисми эса: Дуо ва мақтоворни ўз ичига олади.

Уламолар айтишди: Қиёмул-лайлда истифтоҳ дуоси Набий алайхиссалоту вассаломдан саҳиҳ ҳадисда келганидек, узун дуо билан бўлиши афзал. Ул зот тунги намозни қуидаги дуо билан бошлаганлар:

وَجَهْتُ وَجْهِي لِلّٰهِي فَطَرَ السَّمَاوَاتِ وَالْأَرْضَ،
حَنِيفًا وَمَا أَنَا مِنَ الْمُشْرِكِينَ، إِنَّ صَلَاتِي وَنُسُكِي
وَمَحْيَايٍ وَمَمَاتِي لِلّٰهِ رَبِّ الْعَالَمِينَ، لَا شَرِيكَ لَهُ وَبِذَلِكَ
أُمِرْتُ وَأَنَا مِنَ الْمُسْلِمِينَ، اللَّهُمَّ أَنْتَ الْمَلِكُ، لَا إِلَهَ إِلَّا
أَنْتَ، أَنْتَ رَبِّي وَأَنَا عَبْدُكَ، ظَلَمْتُ نَفْسِي، وَاعْتَرَفْتُ
بِذَنْبِي، فَاغْفِرْ لِي ذُنُوبِي جَمِيعًا، إِنَّهُ لَا يَغْفِرُ الذُّنُوبَ
إِلَّا أَنْتَ، وَاهْدِنِي لِأَحْسَنِ الْأَخْلَاقِ، لَا يَهْدِي لِأَحْسَنِهَا
إِلَّا أَنْتَ، وَاصْرِفْ عَنِّي سَيِّئَهَا، لَا يَصْرِفْ عَنِّي سَيِّئَهَا
إِلَّا أَنْتَ، لَبِيَكَ وَسَعْدِيَكَ، وَالْخَيْرُ كُلُّهُ فِي يَدِيَكَ، وَالشَّرُّ

لَيْسَ إِلَيْكَ، أَنَا بِكَ وَإِلَيْكَ، تَبَارَكْتَ وَتَعَالَيْتَ، أَسْتَغْفِرُكَ
وَأَتُوْبُ إِلَيْكَ

"Осмонлару Ерни яратган Зотга мусулмон бўлиб юзландим ва мен мушриклардан эмасман. Албатта намозим, қурбонлигим, ҳаётим ва мамотим оламлар Парвардигори бўлмиш Оллоҳ учундир. Унинг шериги йўқ. Мен шунга буюрилдим ва мен бўйсунувчилар-мусулмонларданман. Эй Оллоҳ! Сен Маликсан ва Сендан ўзга ҳеч бир (ҳақ) илоҳ йўқ. Сен Парвардигоримсан ва мен Сенинг қулингман. Мен (гуноҳлар қилиб) ўзимга зулм қилдим ва гуноҳларимни эътироф этдим. Менинг барча гуноҳларимни кечир. Албатта гуноҳларни ёлғиз Сен кечирувчисан...", бу узун дуони охиригача ўқиганлар. Шу дуо билан бошлиш афзал, дейишди. Чунки, у нафсни тунги намоз учун ҳозирлашга кўпроқ ёрдам беради.

Пайғамбар алайҳиссалоту вассалом икки ракаат намозни ўқиб бўлгач, саккиз ракаат намоз ўқирдилар. Дастреб тўрт ракаат ўқирдилар, уларнинг гўзаллиги-ю, узунлигини асти сўраманг. Ул зот алайҳиссалоту вассалом уларни ўқирканлар, ташаҳҳуд учун орада

ўтирмасдилар, фақат тўртинчи ракаатдагина ўтирадилар, яъни узлуксиз тўрт ракаат ўқирдилар ва бу нафл намозларда жоиздир. Агар тўрт ракаат нафл намоз ўқимоқчи бўлсангиз, хоҳласангиз иккинчи ракаатда ташаҳҳудга ўтирмасдан узлуксиз ўқинг, истасангиз орасини ажратиб ўқинг. Улаб ўқишдаги суннат, ҳар икки ракаатдан кейин ташаҳҳуд учун ўтирмаслигин-гиздир.

Сўнгра Ибн Аббос деди: "Ул зот алайҳис-салоту вассалом илк тўрт ракаатни тамомлаб, ундан кейин тўрт ракаат, сўнгра витрни ўқидилар".

Ул зот соллаллоҳу алайҳи ва салламнинг тунги намозлари 11 ракаат эди ва бу мўминлар онаси Оиша разияллоҳу анҳодан ривоят қилинган саҳих ҳадисда событ бўлган. У айтади: "*Расуллороҳ соллаллоҳу алайҳи ва саллам Рамазонда ҳам, ундан бошқа ойларда ҳам 11 ракаатдан оширмас эдилар*". Сўнгра уларни изоҳлаб дедилар: "*Аввал тўрт ракаат ўқирдилар. Уларнинг*

*гўзаллиги ва узунлигини асти сўраманг*¹. Бу, қиёмда туришнинг узун бўлганига далолат қиласди.

Уламолар раҳматуллоҳи алайҳим қиёмнинг узунлиги ва ракаатлар сони масаласида ихтилоф қилишди. Аҳли илмдан бир қанчаси: Тунги намозда афзал бўлгани, ракаатлари оз бўлиб, қиёми (яъни қироати) узун бўлгани ва 11 ракаатдан оширгани яхши, дейишган. Бу шарт ва вожиб эмас, фазилатдир. Бу жумхурнинг мазҳабидир.

Қиёмул-лайлда афзал бўлгани, тиловатнинг узун бўлганидир. Чунки Набий соллаллоҳу алайҳи ва саллам шундай қилганлар. Ул зот тўрт ракаат ўқирдилар, уларнинг гўзаллиги-ю, узунлигини асти сўраманг. Бу қавлнинг қувватли эканига ишора қиласиган далиллардан бири, "Саҳиҳ"да Жобир разияллоҳу анҳудан ворид бўлган ҳадисдир. Набий соллаллоҳу алайҳи ва саллам тунги намознинг афзали ҳақида сўралганларида, "Кунутнинг узун бўлиши", деганлар. Яъни қиёмул-лайлда афзал бўлгани

¹ Бешовлари ривоят қилишган.

кунутнинг, яъни қиёмда туришнинг узун бўлишидир. Шуни далил қилиб жумхур уламолар: қироатни узун қилиб, ракаатлар сонини Набий соллаллоҳу алайҳи ва салламдан ворид бўлган саноқда қилишинг фазилат йўлидир, дейдилар. Бу фарз эмас, фазилат жиҳатидандир. Бу қавлни шайхулислом Ибн Таймийя раҳимаҳуллоҳ ихтиёр қилган ва бу ҳақида "Мажмуъ"да шундай деган: Бу фазилат жиҳатидандир. Энди ким ундан кўпайтирса ёки камайтирса, бу жоизмас эканини билдирмайди.

Уламоларнинг баъзилари: Афзал бўлгани, агарчи қиёми қисқа бўлса ҳам, ракаатларини кўпайтиргани, дейишади. Чунки Набий соллаллоҳу алайҳи ва салламдан Амр ибн Абаса жаннатдаги ҳамроҳликларини сўраб: Жаннатда сиз билан ҳамроҳ бўлсам, деганида, "*Саждани кўпайтириш билан менга ёрдам қил*", дедилар¹. Бу ҳадис қиёмул-лайлда саждани кўпайтириш афзал эканига далолат қиласи, дейишди. Агар саждаларни кўпайтирса, шубҳасиз, қиём енгиллашиб, ракаатлар сони қўпаяди.

¹ Муслим ривояти.

Қувватлироқ бўлгани, биринчи қавл: қиёмнинг узун бўлиши афзалдир. Шунинг учун "Саҳих"да Абдуллоҳ ибн Маъсүд разияллоҳу анҳудан событ бўлганки: "У Набий соллаллоҳу алайҳи ва саллам билан тунда намозда турди, алайҳиссалоту вассалом қироатни узун қилдилар, ҳатто Абдуллоҳ ёмон ишни хаёл қилиб қолди. Ундан "ӯшандада нимани ўйлагандингиз", деб сўралганда, "Ул зотни ташлаб, кетиб қолишни ўйладим", деганлар". Бу эса, Пайғамбар алайҳиссалоту вассаломнинг қироатларининг узунлигидан бўлганди.

Рукуъ ва саждаларнинг қиёмга яқин бўлиши

Пайғамбар алайҳиссалоту вассаломнинг суннатларидан яна бири, Анас разияллоҳу анхунинг ҳадисида келганидек, рукуъ ва саждаларнинг қиёмга яқин бўлишидир. Мана шундай ўқилган намоз бунчалар лаззатли бўлмаса! Бу ибодатда энг афзал бўлгани кишининг рукуъ ва саждлари қиёмига яқин бўлишидир, чунки у барча фазилатлар орасини бирлаштираяпти. Қуръон тиловатининг, тасбеҳ ва Оллоҳ жалла жалалуҳ зикрининг ва саждалардаги дуонинг фазила-

тини жамлаяпти. Фазилатларга энг мукаммал ва комил тарзда эришяпти. Шунинг учун уламолар намозда рукуъ ва саждаларнинг узунлигининг teng бўлишини мустаҳаб санаганлар. Буларнинг ҳаммаси инсон якка ўзи ўқигандаги суннатлардир.

Агар жамоат билан ўқиса, унинг ортида заифлар, касаллар, кекса кишилар ва юмуши бор одамлар бўлади, шунга кўра имом уларга шафқатли бўлади ва имкон қадар суннатни қилишга ҳаракат қиласди, лекин одамларга қийин қилмайди. Чунки Набий соллаллоҳу алайҳи ва саллам баъзи ишларни қилганлар, улар уммат учун машруъ бўлиб қолди ва шунингдек баъзи ишларни сўзлари билан уммат учун машруъ бўлиши учун айтдилар. Ул зот дедилар: "Битталарингиз одамларга намоз ўқиса", бошқа бир ривоятда: "Битталарингиз одамларга имомлик қилса, енгил қилсин". Ул зотдан имом одамларнинг ҳолатига риоя қилиши лозим эканлиги ворид бўлган, ул зот дедилар: "Чунки унинг орқасида касал, кекса қария ва юмуши бор кимса бордир".

Энди ёлғиз ўзи намоз ўқиса, истаганича узун қиласверсин. Зеро Пайғамбар соллаллоҳу алайҳи ва саллам кечаси намозга ёлғиз турсалар, узун қиласардилар.

Уламолар айтишди: Агар инсон таровиҳ намозида имом бўлса, одамларнинг аҳволига қарайди, улар учун фазилатни йўқ қиласадиган даражада енгиллатиб ҳам, Оллоҳнинг китобидан ёки Унинг қаршисида туришдан малолланиб қоладиган даражада узун ҳам қилиб юбормайди. Бу иш имомнинг қарашига ва Оллоҳ азза ва жалланинг унга берган тавфиқига боғлиқ бўлади. Агар Оллоҳ таоло имомга яхшиликни ирода қилган бўлса, унга одамлар орасида ундан рози бўлишни беради. Агар имом одамларнинг аҳволини риоя қилиб, уларга шафқатли бўлиб ва шариат ҳудудида уларга кенглик қилиб бериб, уларни ўзининг орқасида намоз ўқишни яхши кўрадиган ва Оллоҳнинг зикри билан роҳатланадиган қилиши, буюк ғанимат ва кўп яхшиликдир. Шак-шубҳасиз, одамлар эзгуликни яхши кўрадилар, улар ўша имомга келадилар ва унга интиладилар. Бу эса, одамларга узун қилиб, эзгуликни яхши кўришдан маҳрум қилгандан ва

жамоатга келишга бўлган ҳарисликларини йўқ-қа чиқаргандан афзалдир. Шубҳасиз, афзал ва комил бўлгани, агар иқтидо қилувчилар орасида шафқат қилишга муҳтож бўлгани бор бўлса, унга шафқат қилинганидир.

Рукуъда Оллоҳни улуғлаш

Рукуъда Оллоҳ таолони улуғлаш, Пайғамбар алайҳиссалоту вассаломнинг йўлларидан эди. У киши рукуъга бориб, рукуъларини узун қилас ва Оллоҳ таолони улуғлар ва Унга сано айтишни кўпайтирар эдилар. Саҳиҳ ҳадисда, Оллоҳни улуғлаганликлари ва мадҳ этганликлари, "(Оллоҳ ҳар қандай айбу нуқсондан) Пок ва муқаддас зотдир. Малоикалар ҳамда Рӯҳ – Жаброилинг Парвардигоридир"¹, деган сўзларида ворид бўлган.

Саждада жамловчи дуолар қилиш

Яна Пайғамбар алайҳиссалоту вассалом, қиёмул-лайлдаги саждаларида дуо қилас ва улуғ дуоларни — динда саломат бўлишни ўз ичига

¹ Муслим ва Абу Довуд ривояти.

олган дуоларни ихтиёр қиласылар. Улардан Уммул-мүминин Оиша разияллоху анходан ривоят қилингандай саҳиҳ ҳадисда келган сўзларини олишимиз мумкин. Дедиларки: "(Кечаларнинг бирида) Набий соллаллоху алайҳи ва салламнинг йўқликларини билиб қолдим ва қўлимни у ёқ-бу ёққа қилдим ва қўлим ул зотнинг оёқларига урилди, ул зот сажда қилган ҳолатда "Эй қалбларни ўзгартирувчи зот, қалбимни динингда мустаҳкам қилгин", дердилар. Оллоҳ таолодан қалбларимизни Ўзининг динида мустаҳкам қилишини сўраймиз. Пайғамбар алайҳиссалоту вассаломнинг ҳикматларига, Раббисини қанчалар билишларига ва басиратларига қаранг, дин, дунё ва охират саодати ва нажотини ўз ичига олган бу дуони танлаганлариничи?! "қалбимни динингда мустаҳкам қилгин", дердилар.

Уламолар: Қиёмул-лайлда дуо қилувчи киши, дуоларнинг афзали ва жамловчироғини танлаши мустаҳаб, дейдилар. Пайғамбар соллаллоху алайҳи ва салламнинг ушбу улуғ дуоси ва шу сингари маъсур дуолари каби дуолардан кўра афзалроқ ва жамловчироқ дуо йўқ.